

REGIONAL NEWS

HEADLINES:-

1. Mizoram Lok Sabha bial inthlan vote thlak runpui hma-in tar chak lo leh vohbikte puala anmahni in luma vote thlak kalpui mek chu naktuk hian zawhfel vek a ni ang.
2. Lok Sabha Mizoram bial inthlan lo awm turah vote thlakna Polling Station 1,276 ruahman a ni.
3. Zirtawpni atanga East Lungdar-a tan, Mizoram pum huap Presbyterian Kohran Pavalai Pawl Intawhkhawm chu zanin hian a tiak ang.
4. Lok Sabha inthlanpui thawh khatna, tun kar Zirtawpni-a neih tur atan party tinin ngawrh takin campaign beihpui an thlak zel.

<><><>

HOME VOTING

Mizoram Lok Sabha bial inthlan vote thlak runpui chutun kar Zirtawpni khian neih ani dawn a, tar chak lo leh vohbikte puala anmahni in luma vote thlak kalpui mek chu naktuk hian zawhfel vek tum a ni.

Kum 85 leh a chunglam leh vohbikte tana anmahni in luma vote thlak hi Lunglei district-ah April ni 4 atang khan tanin bul tan hmasa ber an ni a, Kolasib district-in dawtin April ni 5-ah an tan a. District tam berin April ni 8 atanga tanin a tan hnukung ber Champhai district chuan Zirtawpni khan an tan a, naktukah hian a vaiin zawh fel tura ruahman a ni. Election department atanga thu dawn danin kum upa mahni in luma vote thlak dil 1,823 leh, vohbik zingah in lama vote thlak dil mi 302 an awm bawk a, an vai hian mi 2,125 niin an dilna hi pawm vek a ni. In lama vote thlak buaipui tur hian mobile polling team 99 din a ni a, anni hian in lamah kal chilhin vote an thlaktir a ni. Aizawl district-ah mahni in luma vote thlak dil leh phalsak an tam ber a, tar chak lo mi 820 leh vohbik 54, an vaiin mi 874 in April ni 8 leh ni 10 inkar khan anmahni in lumah vote an thlak a ni.

In lama vote thlaktir hi tun Mizoram assembly inthlan atanga buaitsaih tan kha a ni a. Vote tla a tam theihna atan leh mitinin vote thlak theihna tur remchang an neih theihna tur atana Election Commission of India-in ruahmanna a siam thar a ni.

<><><>

POLLING STATIONS

Lok Sabha Mizoram bial inthlanna lo awm turah vote thlakna Polling Station 1,276 ruahman a ni.

Polling Station 1,276 zingah hian thingtlang ah 751 leh khawpui ah 525 awmin , Polling Station hi hmun hrang hrang 1,166 ah siam a ni a. Chawhrualin Polling Station pakhatah vote nei mi 671 zel awm ang a ni. Venhimna uluk lehzuala kalpui ngai polling station 14 awmin, critical Polling Station an tih mai, vote tla za zela 90 ai a tam a nih a Candidate pakhatin vote tla atanga za zela 75 aia tam a hmuhna polling station 5 a awm bawk a. Lirthei luh lohna, ke a pan ngai Polling Station 11 leh Lawngleng hmang chauhva thlen theihna Polling Station 15 a awm bawk.

Polling Station pakhat chauh awmna hmun 1,069 awmin, Polling Station pahnih awmna hmun 87, Polling Station pathum awmna hmun 7 leh Polling Station pali

awmna hmun 3 a awm a. Auxilliary Polling Station 4 leh, Model Polling Station 25 a awm bawk a ni.

<><><>

BOISU FEST

Larsap Dr Hari Babu Kambhampati chuan nimin khan Bru Boisu vawi 3-na chu Cultural Centre cum Auditorium, Vaivakawn ah khuallian niin a hmanpui.

Boisu festival hi Bru tana kum thar chhinchhiahna niin, kum tin April ni 13 leh 15 inkarah lawm thin a ni a. Kumin thupui atan “Insuihkhawmin kan khawtlang I siamtha ang u” tih hman a ni. Larsap chuan Bru hnam tan a hun pawimawh tak “Boisu kut” a telpui thei chu lawmawm a tih thu sawiin, Bru khawtlang hruaitute chu Sawrkar laipui in mipui hmasawmna tur ruahmanna hrang hrang a duan - PM Jeevan Jyoti Bima Yojana, PM Suraksha Bima Yojana leh a dangte chu ngaihven a, mipui hriat zau tura hma la tura chahin, an kal zelna turah duhsakna a hlan a ni.

Larsap chuan India ram ropui na ber chu hnam hrang hrang kara inpumkhatna a nih thu sawiin, hnam inpumkhatna vawng nung zel tur leh midangte nunphung, hnam zia te in zahthiam turin kalkhawmte a fuihbawk a ni.

<><><>

MPSC CHAIRMAN

Naktuk atanga MPSC Chairman Pu J.C. Ramthanga bang tura nawrna atana a pisa kal tur dan an rel chu kaltlangpui an tum thu MZP hruaitute'n an sawi.

MZP hian tun hnai a Combined Competitive exam buatsaiha mark pek thenkhat thaichhiat leh siamthat awm chungchangah MPSC chairman chu mawhphurhna la a bang turin an lo phut tawh a. Bang tura hun an tiam, Zirtawpni thlenga a la ban loh avangin hemi ni tlai a MZP General Headquarters executive committee thutkhawm hmanhmawh an kohah Thawhtanni atanga MPSC chairman pisa kal tur dan hi an rel ta a ni. Thil fel lo awm ni a an tarlan bakah hian department engemawzat a hna lak tur chungchangah felhlel a awm nual niin MZP chuan an sawibawk a ni.

<><><>

HPC-D CADRES

Tun hnai khan Mizoram Police CID (SB) hnuai a special operation team (SOT) mite chuan Lalhingthanga Sanate kaihhruai HPC (D) peng mi 3-te chu tukluih pawisa an khawn avangin an man.

An mi mante hi Lalzarzova (47), Mauchar khua, Lalropianga (38) Thingtuikual khua, Manipur leh Lalmuankima (47) Mauchar khuate an ni a. Tuirial Hydel Project-a NEEPCO pisa leh a bul hnai a hnamdang zin veivakte hnena pawisa an chhuh luihsak thin avanga man an ni a. Sakawrdai Police Station-ah thubuui ziahluh a ni. Lalzarzova hi Thawhtanni kalta khan Kolasib district-a Fast Track Court chuan ruihlo a kawl avangin thiam loh chantirin kum 10 lungin tang tur leh cheng nuai 1 chawi turin a lo hrem tawh a. Kum 2021 March ni 20 khan Lalzarzova hi Kolasib district excise and narcotics hnathawkte'n heroin gram 324 nen an man a, hrisel loh chhuanlamin hemi kum vek August ni 15 khan bail-in chhuah a ni a. Bail a a chhuah lai hian pawisa khawnin a hel thiante nen hian dan bawhchia-in an lo che ni a thu dawn a ni.

HPC (D) hi a phel hnu-ah a lian lam pawl chuan Mizoram sorkar nena inremna siamin kum 2018 khan an silai an tung a. An inremna angin Sinlung Hills Development Council tih thin chu Sinlung Hills Council ti a hming thlakin tunah

hian HPC invuah party-in sorkarna an la chelh a ni. A phel leh lam Lalhmingthanga Sanate pawl hi Assam chhim lam Hmarkhawlian khua-ah awmin Mizoramah pawisa an rawn khawn thin avangin an mite hi vawi tam tak man an ni tawh thin a ni.

<><><>

MEN'S FELLOWSHIP

Mizoram pum huap Presbyterian Kohhran Pavalai Pawl Intawhkhawm vawi 6-na chu Zirtawpni atang khan East Lungdar-ah tan a ni a, zanin hian a tiak ang. Intawhkhawm thupui 'A chhe lai siamthatu' tih chu speaker, Rev. C. Zorammawia, Senior Executive Secretary-in Pathianni chawhma, chawhnu ah a sawi a, zan inkhawmah a sawi leh ang. Zirtawpni zanah khan Synod Moderator Rev. R. Vanlalnghaka'n thuchah a sawi a. Inrinni chawhmaah Revival Director Rev. R.C. Lalnghakliana'n thuchah a sawi a, chawhnu-ah zaikhawmpui buatsaih a ni a, zanah committee member Rev. R. Lalnuntluanga'n thuchah a sawi bawk. Intawhkhawm chung hian inkhawm apiangin zaipawl a awm thin a. Mizoram Synod Choir bakah Bial leh Kohhran hrang hrang Pavalai Zaipawl te an zai thin a ni. Ram pum huap Kohhran Pavalai Pawl Intawhkhawm vawi 6-na Pandal-a neih hi a tum khatna a ni a, Kohhran Pavalai Pawl hi Synod Revival Department-in a enkawl a ni.

Puan tawh thin angin Pavalai Intawhkhawm thlenna tur pandal hi February thla tawp lamah sa tanin engkim zawh fel thawkhat a nih hnuah, March 31 (Easter Sunday) chhuna thli tleh khan a nuai a, pandal hi a tlu sawp ta vek a. A tuk, Thawhtanni (April 1)-ah mi 700 chuang hnatlangin a tul anga singsak nghal niin ban phun thar lehnghalin tlar li lai phun hman a ni a. Pandal sak that lehna-ah hian bial chung leh pawn lam atangin kohhran pawl pawh sawi lovin nitin mi 200 bawr vel chu thahnemngai takin an hnatlang thin a, ni li chung velin Pandal sak hna zualpui chu zawh fel hman a ni.

<><><>

LS 1ST PHASE CAMPAIGNING

Lok Sabha inthlanpui thawh khatna, tun kar Zirtawpni-a neih tur atan party tinte ngawrh takin an campaign mek a, party hruaitute chu state hrang hranga an candidate-te tan thahnemngai takin an campaign a ni.

Puan tawh angin seat 543 awmna, Lok Sabha inthlanpui hi thawh 7-in, April ni 19 atanga June ni 1 thleng neih tura ruahman a ni a, vote nei mi maktaduai 970 vel an awm a ni. Inthlan thawh hmasa ber, tunkar Zirtawpni-a neih turah state leh union territory 21-a seat 102-ah vote thlak a ni ang.

Lok Sabha inthlanpui neih rual hian Andhra Pradesh, Arunachal Pradesh, Odisha leh Sikkim assembly inthlan neih a ni dawn a, state 16 huamchhunga seat 35-ah by-election neih nghal a ni dawn bawk a ni.

<><><>

BJP ANNOUNCE MANIFESTO

BJP-in Lok Sabha inthlanpui 2024 atana an party inthlan manifesto, 'Sankalp Patra' chu vawiin khan New Delhi-a an party office-ah an tlangzarh a, manifesto hi Defence Minister Rajnath Singh-a kaihhruai member 27 awmna Committee-in a duan a ni.

Tlangzarh inkhawmah hian midang bakah BJP hruaitu senior, Prime Minister Narendra Modi, party President JP Nadda leh Union Home Minister, Amit Shah-te an tel a ni.

<><><>